

Ny Valosoa sy hadihady

Raharaham-pirenena

Ahiana ny fipoahana mahery vaika eo anivon'ireo andrim-panjakana

Mivadika ambony ambany ny toe-draharaha eo amin'ny sehatra rehetra amin'izao fotoana izao, izay heverin'ny an-daniny ho fitsinjovana ny mpiray firenena eo amin'ny sehatra sosialy sy aravelomana dia tsy eken'ny an-kilany, satria famotehana ny seha-pihariana sy ny tontolo iainana. Ny fanokafana ny "Base Toliara" no tiana ho lazaina ary ny zava-doza dia miteraka lonilony sy fifanandrinana eo amin'ny foko roa miara-monina any an-toerana ireo lalantsaina roa ireo. Ny zava-misy mifandriotra dia ny manampahefana any an-toerana dia mihevitra, fa hiteraka asa ho an'ireo gasy, avy any amin'ny Faritra Androy, mifindra monina ao an-tampon-tanànan'i Toliara dia hahazo asa ao amin'ity orinasa ity. Noma-rihan'ireo manampahefana, fa lasa mpivarotra amoron-dàlana fotsiny ireo mpifindra monina satria tsy mahita asa. Etsy an-kilany kosa ireo tena mponina hatramin'izay manodidina ity "Base Toliara" ity dia efa niaina ny voka-dratsin'ny fitrandrahana fasimainty, tamin'ny fotoan'andro, izay mamotika ny tontolo iainana sy manimba ny toe-pahasalaman'ny vahoaka. Raha tena mihevitra sy mitsinjo ny fampivoarana ny fiainan'ny vahoaka ny manampahefana any Toliara dia hanao izay hampihodina indray ireo orinasa nanao ny naha izy azy fahiny: SNHU, SUMATEX, TOLY, sns,... Raha izay tokoa no hataon'ny fitondrana dia tena handroso sy hahita asa daholo izay mifindra-monina sy ny efa ao an-toerana. Ny tena zava-doza mantsy dia miteraka fifanandrinana sy fifampihantsiana eo amin'ny mpiray Tanindrazana ny fizaririana amin'ny fanokafana indray ny "Base Toliara". Ny lafiny miabo ihany koa, eo amin'ny famerenana ireo orinasa voatanisa etsy ambony hamokatra indray dia hiverina ny fambolena kapika sy hasy izay niroborobo tokoa, ary ny orinasa farany, hanamboatra fitaovana hoentina mamboly. Raha ny kabarin'ny filohan'ny Antenimierampirenena Razanamahasoa Christine, nandritra ny fifampiharabana nahatratra ny taona 2023 ny Fikambanan'ny Zank'i Fianarantsoa dia mahatsiaro ho maty antoka izy ireo, ka nitaky ny hanomezana minisitara folo sy ny toeran'ny Praiminisitra ho an'ny zanaky ny Faritany. Tsapan'ny zanak'i Fianarantsoa ihany koa izany, fa niasa jamba rafozana ihany izy ireo satria tsy azony ekena ny fa-

nimbazimbana ny filohan'ny fikambanan'izy ireo nataon'ny filohan'ny Repoblika taorian'ny fitsipaham-pitokisana nataon'ny solombavambahoaka dimy ambizato. Nitsabaka lalina tamin'ity raharaha ity ihany koa ny mpanolotsaina manokan'ny filohan'ny Repoblika, ka nanomboka ny Filohan'ny Antenimierampirenena ary nisy ireo solombavambahoaka namoaka vava, fa ho ravy ny Birao Maharaitry ny Antenimiera. Tsy niandry ela dia voatsoka tsy ho talen'ny Kabinetran'ny Fiadianan'ny Repoblika ihany koa Raharinirina Baomihavotse, izay avy any Fianarantsoa. Heverina fa fihetsika tsy voahevitra loatra izany, satria mampitombo ny disadisa tsy eo amin'ny samy manampahefana fotsiny, fa eo anivon'ny mpiray Tanindrazana mihitsy. Nahatsiaro ho tsy mba nahazo avara-patana ao amin'ny governemanta ihany koa ny solombavambahoaka iray avy any amin'ny Faritra Sofia, kanefa mba misy avara-pianarana maro ihany avy any. Tsy mazava amin'ny Malagasy intsony hoe iza amin'ireo ao ambony ao no tena manana ny teny farany, satria raha nanameloka ny fananihambohitra ataon'ny Rosiana any Ukraine ny minisitry ny Raharaham-bahiny teo aloha, Randriamandranto Richard, dia voatsoaka teo amin'ny toerany satria tsy nifanarahana hono, iny fanapahankevitra iny. Ny ministry ny Raharaham-bahiny vaovao, Yvette Sylla, vao voatendry herinandro, dia nandatsabato manohana ny fialan'ny rosiana any Ukraine, ka asa raha ho voatsoka ihany koa satria nanambara ny mpanolotsaina voalohany ao amin'ny masoivohon'i Rosia eto an-toerana fa diso fanantenana tamin'ny latsabaton'i Madagasikara farany iny. Na tiana na tsy tiana dia misy resaka "foko" mifanohitra ara-kevitra sy mifanilikilika eo amin'ny fitantanana ny Firenena ary mifampihantsy sy manao farateny eo amin'ireo tranga ireo, ka sao tsy fipoahana ara-tsosialy intsony no haterak'izany fa fipoahana mahery vaika eo anivon'ireo andrim-panjakana mihitsy. Manao fanambadian-boa-lavo ireo mpitondra ka samy mikepoka izay azony, kanefa tsy maintsy mailo ny olompirenena rehetra, fa rehefa ho vaky hono ny sambo dia ny voalavo no miporitsaka voalohany.

Andry Tsiavalona

Me Eloi, birao politikan'ny TIM  
Teboka 3 hanatsarana ny lalàna, mba ho eken'ny rehetra ny fifidianana

Naneho hevitra momba ny fifidianana sy ny fifidianana filohampirenena ho avy eto amintsika, hatao amin'ity taona ity, Me Eloi Ratefimahefamijoro, mpikambana amin'ny birao politikan'ny antoko Tiako i Madagasikara (TIM). Nambarany, fa: mitaky ny hanatsarana ny lalàm-pifidianana 2018-008 ny antoko Tiako i Madagasikara, mba hanàna fifidianana madio sy eken'ny rehetra, teboka 3 monja no hasiana fanitsiana :  
- Ny momba ny « Plafonnement des dépenses de campagne », (famerana ny fandaniam-bola amin'ny propagandy), mba hampitovy tantana ny kandida rehetra amin'ny fahalaniany na ny " égalité de chance d'être élu ".  
- Ny momba ny « Commission de contrôle de financement de la vie politique », (vaomiera hanara-maso ny famatsiam-bolan'ny tontolo politika), mba ho « contrôle simultané », ka ho afaka avy hatrany hanao ny fitsirihina mialoha sy mandritra ny fampielezan-kevitra mahakasika ireo fandikan-dalàna rehetra mety ho hitany, sy ny fampianarana-dalàna ny kandida mihao-pefy.  
- Ny fanendrena ny « membre de bureau de vote », (mpikambana amin'ny birao fandatsaham-bato), mba ho 3 na 2 volana mialoha no voatendry, ary manana ny fetram-pahalalàna takian'izany.

Isambilo



Me Eloi Ratefimahefamijoro.

VEHIVAVY TIM ANALAMANGA

Ao amin'ny Magro Behoririka no hankalazana ny 8 martsa

Anisan'ny handray anjara amin'ny fankalazana ny 8 martsa, andro eran-tany ho an'ny vehivavy rahampitso alarobia koa, ny Vehivavy TIM Analamanga araka ny nambaran'ny filohany: Arphine Rahelisoa omaly, tao amin'ny fandaharana Dinika, ny fahitalavitra MBS, sy efa nambara ihany koa tamin'ireo mpikatroka Andriambavilanitra ao amin'ity antoko najoron'ny filoha Marc Ravalomanana ity. Vavaka, famelabelarana arahina ady hevitra momba ny zo sy ny andraikitra ny vehivavy eo amin'ny fiaraha-monina, sy eo amin'ny fiainampirenena no anisan'ny hatao amin'izany ao amin'ny kianjan'ny Finoana. Hisy avy eo ny fanentanana ny olona hiditra ao anatin'ny listry ny mpifidy hataon'izy ireo eto an-drenivohitra, satria zava-dehibe loatra ny fifidianana filohampirenena ho avy io, hanovana



Ny vavaka iraisam-pinoana, ho fanombohana ny fankalazana ny 8 martsa tany Toamasina.

ny tsy rariny misy eto amin'ny firenena, sy hialana amin'izao fahasahiranana sy krizy lalina mahazo ny firenena sy ny vahoaka izao. Mahakasika izay fankalazana ny andro manerantany ho an'ny Vehivavy izay ihany fa tany amin'ny Faritra Atsinanana. Ny Sabotsy 04 Martsa teo,

nanatanteraka fotoam-pivavahana iraisam-pinoana, tao amin'ny Fiangonana Anglikanina Katedraly Santa Jakôba, izay notarihan'ireo Ray amandreny FFKM, ny tany antoerana, mba ho fangataham-pitahiana ho an'ireo Vehivavy. Rahampitso alarobia, filaharambe hataon'ireo An-

driambavilanitra sy ny fikambanan'izy ireo, no anisan'ny hanamarihana izany any amin'ny Araban'ny Fahaleovantena any amin'ny renivohitra ny faritra Atsinanana, anisan'ny handray anjara mavitrika amin'izany ny Vehivavy TIM sy ny Vehivavy RMDM.

Niaina/ Fanja Aina

TONONKALO

Ny ekipa volon-daoranjy

Andro sisa no isaina dia haneno ny anjomara, Ary dia handao ny kianja iretsy ekipan'ny mapara. Angamba hiondri-doha tanteraka sady tena tsy hahatraka. (Tsisy baolina tafidiny ka dia tena afa-baraka !)

Ireo mpitsara ny lalao dia tapitra nokaramainy. Kolikoly no talentany sady zavatra mba hainy, Miampy ny lalaom-boto izay toa lasa fahazarany. Eny, hatramin'ny mpijery no anehoany ny hasomparany !

Mbetika no mifamaly izy samy iray ekipa. Toa tsy mahalala menatra na ny bandy na ny sipa. Raha ny vava dia ananany, misapaoritra "ny pokona", Fa ny ankoatr'izay dia "aotra", vendrana izy, tsisy hatokona!

Tena manavanana azy izany hoe mikapa ranjo, Ny mamingana, mamely, indrindra ny mitana akanjo. Ny mpitsara moa mazàna no toa modimody jamba. Misy "kopaka isasahana" any ambadika any angamba!

...Izay no momba ilay ekipa notantan'ny Boaikely. Tsy mahomby, tsisy hafitsoka, ary tena tsy mamely, Nefa dia mikiry fatratra ny hoe mbola hiaka-tsehatra, Ka dia aoka ho mailo isika fa vao mainka hamohehatra !

DADAN'i ZINA (01-03-23)